

溥常法師著

華嚴綱要淺說

范嘉農題

華嚴綱要淺說

全 一 冊

中華民國二十年五月初版

◎每冊定價大洋二角半

(外埠酌加郵費)

著 述 者 溥 常 法 師

校 印 者 佛 學 書 局

印 刷 者 國 光 印 書 局

上海新大沽路六七一號

電話三三七四三號


總發行所 上海佛學書局

開北新中路中國慶路口

分發行所 上海佛學書局

北火車站東首寶山路口

分銷處 各埠佛經流通處



影近師法常溥

大方廣佛華嚴經綱要淺說序

竊詳大方廣佛華嚴全經大旨。統唯一眞法界。蓋圓賅萬有。唯是一心。覲體全眞。融通交攝。是諸佛極證之果海。亦卽衆生本有之心源也。以言其性。如太虛洞然而無物。以言乎相。則萬象森然而駢陳。其所謂森然者。卽行布也。一而萬者也。所謂洞然者。卽圓融也。萬而一者也。圓融不礙行布。故一爲萬而不見其少。行布不礙圓融。故萬爲一而不見其多。此其大較者也。然而善財之見文殊。根本之智已得。畢乎一者也。而差別之智未圓。於是歷百十城。覲五十知識。或瞋或喜。或逆或順。親證無量法門。而欲見乎萬者也。茲姑舉其略而陳之。其所不舉者。可類推而見之矣。甯波七塔報恩佛學院主講溥常法師。爲諸學子。演講華嚴。慮初心人。未易領解。懸挈全經綱要。作淺顯解說。乃命名曰華嚴綱要淺說。具見爲人之情殷也。且夫經體既名一眞法界。然法界勢含四重。而重重無盡。又以十界因果爲宗。而因果緣起六位。且位位融圓。融圓不礙乎行布。行

布其圓融。平等未離乎差別。差別其平等。始則舉法界以全因果。萬法萬行。昭然終則融因果而混同法界。一毫一塵廓爾。雖重重六位有殊。隱顯開合。靡定原始要終。究不離乎一眞法界也。釋此經者。唯二大老。一棗柏李長者之合論。二清涼觀國師之疏鈔。疏鈔意極精微。冲深包博。合論得盡大體。直截根源。其文雖明顯。而出顯爲難。意實幽玄。而通玄不易。自非深詣圓極。久淹經文者。無繇措手。今溥常法師。運大悲心。伸妙手眼。其始也繪圖。揭示全經品卷。說明七處九會四分五周。瞭如指掌。其次也提綱。節略經文疏義。稱性發揮。明如日星。俾彼聞者。爇一丸而具聞衆氣。嘗一指而全鼎皆知。類天池之一滴。味具百川。猶帝網之千珠。光含衆影。意甚明而斑斑可考。言雖簡而處處指歸。爲憐三尺子。不惜兩莖眉。眞乃血筆肝文。婆心熱語已也。而又懇懃徵序。予何敢以不文辭。爰述之以爲樂法者勸。

佛生二千九百五十八年歲在庚午

彌陀聖誕後二日四明觀宗寺卓三諦閑述於退隱之蜜藏居

華嚴經綱要淺釋序

羅傑

佛法八萬四千法門。正如華嚴藏海。帝網重重。交光互映。不卜從何處可入。其入處維何。學菩薩行。求佛智智而已矣。雖然博地凡夫。談何容易。我釋迦文佛。悲憫衆生。沉淪苦海。無由出期。不捨誓願。說法四十九年。講經三百餘次。凡以示有情學菩薩行。求佛智智途徑也。溯說經之始。厥惟華嚴。博大淵深。望洋興歎。雖有古德疏論。義苦幽玄。溥常法師智悲淵廣。行解圓澄。寢饋功深。由賅返約。徇高足沙門之請。撰綱要淺說。索序於余。余受而讀之。其書移圖冠首。分周處會。若網在綱。經文義疏。併撮大要。分析顯豁。重重華藏。約爲生佛心源。賢聖智身。各顯度人神愛。論漸則歷階五位。述頓則立證菩提。洵初學之明鏡。闇室之朗月也。是經顯蜜圓融。途開頓漸。何以徵之。蓋我毘盧遮那佛於普光明殿。遊多林等處。以法身說法。眉目膝足。疊放祥光。被者當下卽證普賢彌勒文殊諸菩薩。摩頂答詢。善財俗身。卽時見佛。凡此皆神力所加持。默授卽身成佛之

密諦也。普賢菩薩在毘盧遮那成佛神變經中。厥爲金剛薩埵。傳佛密因。在華嚴本經中。爲法王長子。入定受加說法。願海淵廣。表現智行境界而外。特闢橫出三界之途。於念佛往生極樂。殷勤啓示。六經五論。相互詳陳。何經之捷也。然淨密二宗。雖胥屬頓教。而修慈持戒。捨緣住心。與誦讀大乘經典。實爲上品中品資糧。融菩提大悲信住行向禪定般若菩薩戒相顯密大乘教義於一期報身。實爲出世究竟方便。如是熏修。方能各各見佛。聞法。二者皆非倖獲。至若各品專詳十信十住十行十回向爲菩薩地前加行。十地智地爲等覺妙覺道路。實爲顯乘漸入之常型。一佛所宣。大悲同體。蓮華藏海。互攝一心。觀威光太子見佛放光現通說法。頓受十法三昧。善財童子。百城烟水。神足風馳。五十三參。觀善知識。畢竟一眞法界。顯密兼融。頓漸二門。隨根悟入。皆獲無生法忍。無上正等正覺菩提。行者苟欲學菩薩行。求佛智智。舍此弗由。奚可哉。奚可哉。

序

我佛一代時教。首唱華嚴。一切教義。皆從此出。號爲根本法輪。言其義理。則豎窮橫遍。言其文字。則汪洋無盡。然總其樞機。不出信解行證四字。何者。我佛出世。欲令衆生自證固有之如來智慧德相。與十方三世一切諸佛等無有異。但以衆生妄想執著。證入爲難。故須離妄想除執著。此固有資於二行。二行者。何一爲涅槃門。二爲菩提路。能行此二。方獲普賢。普賢行者。其證佛智之利器乎。夫行必有其道。不知其道。則望洋興歎。而不敢投足者有之。盲目無覩而悵悵何之者有之。若是乎。宜先開其眼界。示以徑域。令諸衆生了解無滯。庶幾可耳。然欲了解。須先令其心理專注研究。方有成效。苟語者諄諄。而聽者藐藐。何能引起注意。而生了解。故先之以起信。信爲道源功德母。長養一切諸善根。無他。苟於如來德業能深樂欲。庶於如來實相能深認識。是故由信而解。由解而行。由行而證。而後如來出世教化衆生之本懷。方得圓滿。一切教義莫不如此。而

此根本法輪爲其軌範耳。華嚴一經。具有三部。釋迦滅後。藏諸龍宮。龍樹大士誦其小本。出示世間。經數百年。傳來我國。晉佛度跋陀譯出六十卷三十四品。唐實叉難陀譯出八十卷三十九品。此洋洋大典。係集如來說法九會而成。而於信解行證四事。具足了義。佛所證法。其體大。其用方廣。菩薩所行法門。無量如雜華之嚴飾。故曰大方廣佛華嚴也。大方廣佛爲果。華嚴爲因。因該果海。果徹因源。所信者信此。所解者解此。將此八十卷靈文。攝我佛一代時教。罄無不盡。何其宏肆而該羅也。賢首宗師著述疏釋。亦頗廣博。近世學者根機淺薄。對此大經不易卒讀。寧波報恩佛學院溥常老法師既以大經教授學子。復以每品經文約舉大義。編成講義。名曰綱要淺說。令學者立信解之基。其深得我佛教化衆生之心乎。書成囑上海佛學書局印行。而索序於余。余因疾稽遲。出版期近。倉卒握管。言不成文。民國二十年五月范古農槃譚序。

大方廣佛華嚴經綱要淺說

報恩佛學院主講溥常輯述

大矣哉華嚴一乘教海。具德圓融。諸經之通體。諸法之通依。一切衆生迷悟本。一切諸佛所證窮。諸菩薩行自此出生。故我毘盧遮那如來。最初爲法身大土所說。十地論云。一時婆伽婆。成道未久。第二七日也。末世業障凡夫。居於五濁惡世。雖清涼云。見聞成種。恍若有眼不見舍那身。有耳不聞圓頓教者。示參等同學二十餘人。相集而言曰。來此報恩佛學院。三年期限將滿。華嚴大經。愧未深入堂奧。請求重說。發揮法要。既承傳之於口。更勞筆之於書。余曰。否。如來於一微塵。破大千經卷。賢首一家教觀。諸祖造論著疏。闡揚淨盡。無有過上者。况釋迦掩室於室羅淨名杜口於毘耶。無言之言。了了更暢。何煩贅述。僉曰。時值末法。衆生根鈍。當面錯過。華嚴海藏。文義幽深。卷帙浩繁。汗漫難究。心領神會。甚不易易。余乃緩頰曰。唯。素性疏懶。不喜弄筆。愧恨年老六五。作文又拙。枯腸

搜盡不能滾滾而來。雖登華座演講。如同轉讀。僅具信樂。今不得已。處於牽強。不顧鄙陋。勉其所請。略簡綱要而淺說之。稽首光明遍照尊。蓮華藏海性圓融。普賢文殊冥加護。願沾一滴潤蒙童。天台云。聞首經題。功德無量。此大方廣佛華嚴經。以人法喻三具足爲名。卽一體三寶也。大方廣是法寶。佛是佛寶。華嚴是僧寶。大則極虛空之可度。體無邊涯。方則極滄溟之可飲。法門無盡。廣則碎塵刹而可數。用無能測。佛則離能覺所覺。萬法洞明。華則芬披萬行。榮耀衆德。嚴則圓此行德。飾彼十身。經則貫串文句。以成玄妙。如是舉題。卽攝全經。毘盧遮那如來。現圓滿報身。放光加被。諸大菩薩。承佛威力。說此一眞法界。圓融行布法門。清涼國師。將三十九品經文。以四分五周。七處九會。剖解義蘊。卽所謂以聖教爲明鏡。照見自心。以自心爲智燈。照經幽旨也。

第一舉果勸樂生信分。顯我佛自身。曠劫修證。勸導後學。使見實迹而生信。爲所信因果。周有一會。

初會菩提場。普賢爲主。說如來依正法門。有六品。

第一世主妙嚴品。照常序正流通。乃七處九會發起之通序也。經云。佛在摩竭提國。阿蘭若法。菩提場中。始成正覺。其地堅固。金剛所成。菩提樹高顯殊特。獅子座。高廣妙好。所處宮殿樓閣。廣博嚴麗。世尊坐寶座。於一切法。成最正覺。智入三世皆平等。身徧十方悉充滿。譬如虛空。具含衆像。於諸境界。無所分別。普賢等十佛。剎塵數菩薩。所共圍繞。金剛神等佛。剎塵數世主。常勤守護。師子座莊嚴具中。一一各出剎塵菩薩。其名曰海慧自在等。興供養雲。以上諸菩薩世主。各各申偈讚佛。說解脫法。爾時此世界。佛神力故。六種震動。諸世主現供養雲。心生歡喜信解。各入如來解脫門。此華藏世界如是。十方盡法界虛空界。一切世界海。悉亦如是。竟此總說如來果覺。依正圓融。德用無邊。佛者覺也。摩竭提云無毒害。阿蘭若云無喧諍。世尊處此菩提道場。地如金剛。於宮殿樓閣中。坐寶座成道。本覺智光。重重交映。無障無礙。照見法性體空。說法猶如獅吼。經

云。若有欲知佛境界。當淨其意如虛空。職是故也。普賢等同生衆菩薩。金剛神等異生衆三十九神天。以配三賢十聖。師子座衆以配等覺。約計四十一衆。表顯如來因地所修五位法門。勸發後來賢哲。生信勤修。以此爲宗本。世界震動。表六根清淨互用。世主興供悟法。類通十方。以顯佛佛道同。豎窮橫遍。歷然可觀。海衆雲集。威德熾盛。遮那十身。圓融炳著。同嚴微妙法會。故以此品名居初二如來現相品。正宗分起也。經云。諸菩薩世主。作是思惟。云何是諸佛地。諸佛境界。諸佛加持。諸佛所行。諸佛力。諸佛無所畏。諸佛三昧。諸佛神通。諸佛自在。諸佛無能攝取。諸佛眼耳鼻舌身意。諸佛身光。諸佛光明。諸佛聲。諸佛智。又一切諸佛爲諸菩薩說世界海。衆生海。法界安立海。佛海。佛波羅蜜海。佛解脫海。佛變海。佛演說海。佛名號海。佛壽量海。及一切菩薩誓願海。發趣海。助道海。乘海。行海。出離海。神通海。波羅蜜海。地海。智海。等四十句。菩薩威神力故。於供養雲中。自然出音說頌。如來知衆心念。於面門衆齒間。放刹塵數光。光能說頌。

十方世界海菩薩。蒙光開覺。同來佛前供養。化座坐已。於身毛孔中。現種種色光。一一光中。現刹塵菩薩。徧事諸佛度生。皆得安住毘盧大願海。世尊欲令一切菩薩。得無邊境界神力故。放眉間光。右繞於佛。從足下入。當時佛前有大蓮華出現。此華生已。於一念間。如來白毫相中。有菩薩名一切法勝音。與世界海塵數大士。俱時而出。右繞禮佛已。勝音菩薩坐華台。了深法界生歡喜。觀察十方說頌。復有蓮華慧光等菩薩亦然。如是一四天下道場。十方刹塵菩薩來集。應知一切世界一四天下道場亦如是。竟此說默請四十問。是諸佛智行境界。發起此經大部法門。齒間放光。十方來集。度生入願海者。默答所問。現華嚴法界體性。智慧自在。無礙無盡之相。放眉間光。示說法主佛前華現。表說法依果。勝音等說頌。一切世界海亦然。此顯刹海無障礙法。卽是現智境之相。故以此品名焉。

第三普賢三昧品。三昧此云正定。普賢德用周徧。表法界佛行門。卽答前菩薩

行海問也。經云。普賢於如來前。蓮華藏師子座。入毘盧遮那如來藏身三昧。十方一切國土。所有微塵。塵中多刹。刹中多佛。一一佛前。有普賢入定。十方諸佛。與入一切智性身智。各伸右手摩頂。普賢從此定起。其諸菩薩。各得塵數三昧。海雲。當時世界微動。普雨十種摩尼王雲。一切如來諸毛孔中。咸放光明說頌。菩薩大衆。皆向普賢合掌讚歎。竟此說普賢入定受加。爲說法主。如來摩智光讚。菩薩合掌偈請。以師資道同。智行契合。爲位中普賢現行相。與上品現智相。爲現智行境界。總明自後諸品。一切因果。無非是智行所攝。華嚴事事無礙法界。以普賢爲長子。正此品意也。

第四世界成就品。謂以前說緣既具。此品正陳所說。總明諸佛果相。答法界安立海問也。經云。普賢以佛神力。徧觀察一切世界海。普告大衆。諸佛世尊。知世界海成壞。智不思議等一切法。我承佛力。皆能宣說。爲欲令一切衆生入佛智慧海故。世界海略說有十種。若廣說者。與世界微塵數等。三世諸佛已說當說。

今說竟此說世界海。因緣體性。形狀轉變。差別萬殊。欲令一切衆生。知苦樂染淨等相。各隨自行業力所生。當發起清淨信心。修出要道。得入如來華藏世界海。是故先說此品。

第五華藏世界品。謂前品通明諸佛刹海。此別明本師所嚴依果。答世界海問也。經云。普賢復告大衆言。華藏世界海。毘盧如來。往昔修行大願之所嚴淨。有須彌塵數風輪所持。略舉十種。最上者名殊勝威光藏。能持普光摩尼莊嚴香水海。此海有大蓮華。名種種光明。麝香幢。華藏莊嚴世界住其中。四方均平。金剛輪圍繞。復言。此藏海安布。輪山寶地。香海。河樹林。一一皆世界海。塵數清淨功德之所莊嚴。復言。此中有十不可說刹塵香水海。有十不可說刹塵世界種安住。一一世界種。復有十不可說刹塵世界。彼世界種於世界海。各各依住。形狀體性不同。復言。此十不可說刹塵香水海。在華藏世界海中。如天帝網。分布而住。最中央香水海。名無邊妙華光。出大蓮華。名一切香摩尼王莊嚴。有世

界種住其上。名普照十方熾然寶光明。有不可說剎塵世界布列。其最下方世界。名最勝光遍照爲第一層。第十三娑婆世界。第二十層名妙寶焰世界。復言此無邊妙華光香水海東。有離垢等十香水海。次東又有變化微妙身等百香水海。相續連接。成世界網。而裹以金剛大輪圍山。於華藏世界種種差別。周遍建立。章此說一百一十世界種。各有所表。十種風輪持香水海出大蓮華。表大願風輪持大智海出生無邊妙行之華。嚴持身刹爲佛淨土也。中央一世界種表佛位。總攝一切徧一切。爲萬法之本。次十者表五位一因一果。又次百者表五位因果。各具十波羅蜜。其二十重世界表五位升進及佛位。各具十因十果也。其世界網而裹以輪山者。具一切勝妙莊嚴。皆我佛智行攝化所感也。若約事略舉二因。一約衆生。以如來藏識。卽香水海。亦法性海。依無住本。是謂風輪亦妄想風。此海具恆沙性德。卽正因之華。世出世法皆含攝。若以法性爲海。心卽是華。含藏亦爾。然此藏識相分中。半爲外器。不執受故。半爲內身。執爲自性。